

## მსაჯის აქტიური მხარდაჭერით...

თბილისი. “ლოკომოტივის” სტადიონი. 24 ოქტომბერი.

“დინამო” (თბილისი) – “ზარია” (ვოროშილოვგრადი) 0:0.

“დინამო”: სტეფანია, მოძუაშვილი, კანთელაძე, ხურცილავა, ხინჩაგაშვილი (მაჩაიძე), პეტრიაშვილი, კუტივაძე, ასათიანი, მეტრეველი, გ. ნოდია, ლ. ნოდია.

“ზარია”: ტკაჩენკო, შულჟენკო, ჟურავლიოვი, პინჩუკი, ვასენინი, ფომენკო, კუზნეცოვი, სემიონოვი, ლისაკოვსკი (ელისევი), კუკსოვი, ფურსოვი.

მსაჯი: ა. მეილახშტეინი (მოსკოვი).

ყოველ საფეხბურთო სეზონს, ყოველ საკავშირო ჩემპიონატს ჰყავს სიურპრიზის მომტანი გუნდები. ეს ის კოლექტივებია, რომლებსგანაც არავინ მოელის წარმატებას, ისინი კი, ყველასათვის მოულოდნელად “ციდან ვარსკვლავების წყვეტას” იწყებენ და მაღალ ადგილებს იკავებენ. შარშან ასეთი იყო ოდესის “ჩერნომორეცი”, ადრე – მისნკის “დინამო”, ერენის “არარატი”, ბაქოს “ნეფთჩი”, დონეცკის “შახტიორი”, ტაშკენტის “ფახთაქორი” და სხვანი.

წლეულს რიგი ვოროშილოვგრადის “ზარიაზე” მიდგა. ეს საშუალო რანგის გუნდი, ყველასათვის მოულოდნელად, ცხრილის ზემო ნახევარში აღმოჩნდა და ახლა, გათამაშების დასასრულს, რეალური შანსები აქვს მოხვდეს პირველ ხუთეულში, სწორედ იქ სადაც თბილისის “დინამო”. ამდენად, მატჩს ამ ორ გუნდს შორის პრინციპული ხასიათი ჰქონდა. გამარჯვება ერთ-ერთ მათგანს საგრძნობ უპირატესობას აძლევდა მეორეზე.

“ა” კლასის უმაღლეს ჯგუფში 4 წლის გამოსვლების მანძილზე “ზარიას” არც ერთხელ არ მოუგია თბილისელთათვის. ამ მდგომარეობას გარკვეული ფსიქოლოგიური წინამძღვარი უნდა შეექმნა ჩვენი გუნდისთვის, რათა გამარჯვებისთვის ებრძოლა, მაგრამ ამას გარდა დინამოელებს ისიც უნდა სცოდნოდათ, რომ 10 სექტემბრის შემდეგ ჩატარებულ 7 მატჩში ვოროშილოვგრადელებს გატანილი ჰქონდათ სულ 2 ბურთი, ე.ი. გუნდი ძირითადად ფრედ დამთავრებული შეხვედრების ხარჯზე აგროვებდა ქულებს და თბილისშიც დაცვით ფეხბურთს ითამაშებდა 1 ქულის აღების იმედით.

ასეც მოხდა, სტუმრებმა თავიდანვე საიმედოდ გაამაგრეს დაცვის ხაზები და არ მისცეს მეტოქეს შეტევის გაშლის საშუალება. დინამოელებმა ადრევე ვერ გამოიჩინეს საჭირო აქტიურობა, არ აგრძნობინეს მოპირდაპირეს თავიანთი აგრესიული განწყობილება და, თუმცა, პირველი ტაიმი საერთო ტერიტორიული უპირატესობით ჩაატარეს, ფაქტიურად არ შეუქმნიათ საგოლე მომენტი. ეს, რა თქმა უნდა, ხელს აძლევდა “ზარიას”, რომელიც იშვიათად, მხოლოდ შემთხვევიდან შემთხვევამდე ახორციელებდა კონტრიერიშებს და დანარჩენ დროს შუა მინდორში მოქმედებდა.

“დინამომ” მნიშვნელოვნად გარდაქმნა თამაში შესვენების შემდეგ. გუნდი გადაწყვეტ შეტევაზე გადავიდა და 45 წუთი თითქმის მთლიანად მოწინააღმდეგის საჯარიმო მოედანზე გაატარა, მაგრამ გოლის გატანა ვერა და ვერ შეძლო. “ზარიას” კართან უამრავი კრიტიკული მდგომარეობა შეიქმნა, მეკარე ტკაჩენკოს ბევრი ძნელი ბურთის აღება მოუხდა, შეტევა შეტევას მოსდევდა, გოლი კი არ იქნა გატანილი. ჩვენი თავდამსხმელები და ნახევარმცველები იმაში არიან დამნაშავენი, რომ იერიშს შეგჯუფულად, ქაოტურად აწარმოებდნენ, მოწინააღმდეგის დაცვაში არ ეძებდნენ სუსტ ადგილებს, უზუსტოდ ურტყამდნენ კარში.

“ზარიაში”, რასაკვირველია, დიდ წარმატებას მიაღწია ამ ერთი ქულის აღებით, მაგრამ მის მოპოვებაში მხოლოდ იმ 12 მოთამაშეს არ მიუძღვის ღვაწლი, რომლებიც ამ დღეს მინდორზე გამოვიდნენ. ვოროშილოვგრადელებს დიდად შეუწყო ხელი... მსაჯმაც. დიახ, დიახ, მსაჯმა, ი. მეილახშტეინმა, რომელიც ამ დღეს საოცრად სუსტად, უსუსურად, უვიცად სჯიდა და თავისი არაკვალიფიციური, არაობიექტური გადაწყვეტილებებით აშკარად ხელს უშლიდა დინამოელთა თამაშს.

პირველი უხეში შეცდომა ი. მეილახშტეინმა დაუშვა მე-5 წუთზე. სტუმრების ცენტრალური თავდამსხმელი ლისაკოვსკი დინამოელთა კარის წინ აშკარა თამაშგარე მდგომარეობაში აღმოჩნდა. მეილახშტეინმა მყისვე მიიღო გვერდითი მსაჯის ნიშანი, მაგრამ არავითარი ყურადღება არ მიუქცევია მისთვის და მასპინძლები მხოლოდ იღბლად, ფორვარდის არაზუსტი დარტყმის წყალობით გადაურჩნენ ხიფათს. ლისაკოვსკის რომ გამოეყენებინა ეს მომენტი, არბიტრი ჩათვლიდა ამ უკანონო გოლს.

ამის შემდეგ, მთელი მატჩის მსვლელობაში მეილახშტეინი შეცდომას შეცდომაზე უშვებდა. “ზარიას” საჯარიმო მოედანზე ორჯერ იყო წესის აშკარა დარღვევა. სტუმრებს დაუფარავად გაჰყავდათ დრო, მსაჯის თვალწინ დემონსტრაციულად კენწლავდნენ ბურთს ან შორს აგდებდნენ მას საჯარიმო და თავისუფალი დარტყმების შესრულებისას. მსაჯი კი უყურადღებოდ ტოვებდა ამას. ამას გარდა,

დამნაშავის სასარგებლოდ სტვენას ბოლო არ ჰქონდა. ერთი სიტყვით, ი. მეილახშტეინმა გააფუჭა თამაში, მაყურებელთა კანონიერი გულისწყრომა დაიმსახურა და გამსინჯავი კომისიისაგან “ორიანი” მიიღო.

ფეხბურთის მოყვარულებს ემახსოვრებათ წლევანდელი გათამაშების მატჩის 8 აპრილს “ლოკომოტივის” სტადიონზე თბილისისა და მოსკოვის დინამოელთა შორის, რომელიც ასევე არაობიექტურად, სუსტად იმსაჯა რიგელმა ჰ. სტრენცისმა. ჰ. სტრენცისის მიმართ მიღებულ იქნა სათანადო სანქცია და მას მერე უმაღლესი ლიგის გუნდების მატჩებში იგი მინდორზე აღარავის უნახავს.

იმედი უნდა ვიქონიოთ, ასეთივე სასჯელს მიიღებს ი. მეილახშტეინიც. ამას იგი იმსახურებს.

**რ. ქორიძე.**

**“ლელო”, 27 ოქტომბერი, 1970 წ.**